



UNIVERSITÄTS-  
BIBLIOTHEK  
PADERBORN

**D. D. Emanuelis Gonzalez Tellez, In Inclyta Salmanticensi  
Academia Collegii Majoris Conchensis Alumni, &  
antiquioris vespertinæ Sacrorum Canonum Cathedræ  
propriarii Interpretis; in Pinciano Sanctæ ...**

Additis Notis uberioribus ab Historia, & Chorographia

Complectens Librum Tertium

**González Téllez, Emanuel**

**Francofurti Ad Moenum, 1690**

Capvt XXVII. Innocent. III. (a) Vercellensi Episcopo.

---

[urn:nbn:de:hbz:466:1-74526](https://nbn-resolving.org/urn:nbn:de:hbz:466:1-74526)

## CAPVT XXVII.

Innocent. III. (a) *Vercellenſi Epifcopo.*

**D**ilectus filius G. pro quo canonicando in Ecclesia Novarien. ſcripſeramus, quod intendebat, per noſtras (b) litteras non obtento, contra Canonicos ejuſdem Eccleſiæ nobis propoſuit conquerendo, quod eum pro eo ad Novarien. Capitulum mandatum Ap. miſſemus, ut eum in Canonicum reciperent, & in fratrem, præbendam, ſi qua tamen tunc vacabat, conferentes eidem; ipſi non ſolùm mandatum Apoſtolicum noluerunt adimplere, verùm etiam præbendam vacantem, quam mandavimus illi conferri, præſumpſerunt alii assignare. Unde petebat à nobis, ut quæ de ipſo inceperamus, exequi dignatemur. Magiſter autem Greg. Novarien. Eccleſiæ procurator proponebat è contrà, quia cùm nulla in Eccleſia vacaret præbenda, prædictus clericus ad Ap. Sed. accedens falſò in Eccleſia ipſa nobis ſuggeſſit vacare præbendam, & ad ſuggeſtionem falſam ſuper receptione ſua litteras impetrat. Unde cùm mendax precator carere debeat impetratis penitus, idem procurator ab impetitione ipſius Eccleſiam poſtulabat abſolvi. Cùm igitur coram dil. fil. n. G. ſancti Gregorii ad Velum Aureum Dia. Card. quem eiſdem dedimus auditorem; ſuper his diutiùs litigarint, & idem Cardin. quæ fuerant propoſita coram eo, nobis retulerit diligenter; d. r. per Ap. ſcripta mand. quatenus ſi tibi conſtiterit, quod in Novarien. Eccleſia præbenda vacaret tempore, quo ſuper præbenda jam dicti clerici noſtras litteras receperunt, cùm eam penitus alii in deluſionem mandati noſtri duxerint conferendam, eundem clericum, ſi non alibi ſufficiens habeat beneficium eccleſiaſticum, juxta tenorem prioris mandati noſtri à prædictis clericis recipi faciatis, & eidem de redditibus ipſius Eccleſiæ ſingulis annis competentem assignari proventus, (c) donec ei ſit in beneficio præbendario proviſum.

## NOTÆ.

1. (a) *Vercellenſi.*] Ita etiam legitur in quarta collectione, *ſub hoc tit. de conſeſſ. præbend. cap. 4. De Vercellenſi Eccleſia egi in cap. 10. de foro compet.*  
(b) *Litteras.*] Monitorias, præceptoriasve, de

quibus plura congeſſerunt Petrus Greg. *lib. 7. de reſcript. cap. 4. Azor tom. 2. inſtit. moral. lib. 6. cap. 32. & nos in cap. ex litteris. de reſcript.*

(c) *Donec.*] Et ita debet recipi in Canonicum & fratrem, cum ſpe aſſequendi præbendam proximè vacaturam, ut probavi ſuprà in cap. *relatum.*

## CAPVT XXVIII.

Idem in Concil. (a) *Later. Conſtit. XXXIV.*

**D**e multa providentia fuit in (b) Later. Concilio prohibitum, ut nullus diſverſas dignitates eccleſiaſticas, & plures Eccleſias parochiales reciperet, contra ſacrorum canonum inſtituta; alioquin & recipiens ſic receptum amitteret, & largiendi poteſtate conferens privaretur. Quia verò propter præſumptiones, & cupiditates quorundam nullus hæctenus, aut rarus de prædicto ſtatuto fructus provenit: nos evidentiùs, & expreſſiùs occurrere cupientes, præſenti decreto ſtatuimus, ut quicumque receperit aliquod beneficium curam habens animarum annexam, ſi priùs tale beneficium habebat, eo ſit ipſo jure privatus; & ſi fortè illud retinere contènderit, etiam alio ſpolietur. Is quoque, ad quem prioris ſpectat dominatio, illud poſt receptionem alterius liberè conferat, cui merito viderit conferendum; & ſi ultra ſex meſes conferre diſtulerit, non ſolùm ad alium, ſecundùm Concil. Lateran. [c] ſtatutum devolvatur, verùm etiam tantùm de ſuis cogatur proventus in utilitatem illius Eccleſiæ, cujus illud eſt beneficium, assignare, quantum à tempore vacationis ipſius ex eo conſtiterit eſſe perceptum. Hoc idem & in (d) perſonatibus decernimus eſſe obſervandum, addentes, ut in eadem Eccleſia nullus plures dignitates, aut perſonatus habere præſumat, etiam ſi curam non habeat animarum: circa ſublimes tamen, & (e) litteratas perſonas, quæ majoribus ſunt beneficiis honorandæ, cùm ratio poſtulaverit, per (f) Sed. Ap. poterit diſpenſari.

NOTÆ.